



Geure ondare hurbilenari begiratzea proposatzen dizuegu, normalean, hurbilegi egoteagatik agian, kasu handirik egiten ez diogun inguru horri, alegia. Jarduera hau egiteko, begiak ondo ireki eta adi-adi aztertuko dugu hain ezaguna izateagatik erreparatu ohi ez diogun "paisaia".

Ireki begiak

HELBURUAK

- Ondare kontzeptura hurbiltzea.
- Aldaketa eta iraunkortasun kontzeptuak lantzea.
- Ondarearen egoeraz eta ondarea zaintzeko arazoez ohartzea.

Gai honekin zerikusia duten arloak

- INGURUNE NATURAL ETA SOZIALAREN EZAGUERA.
- PLASTIKA.


Paseatu ...

Ikasleei auzoan, herrian edo hirian zeharreko paseoa egitea proposatu eta gustuko duten toki edo eraikin bat aukeratzeko esango diegu. Gero, toki edo eraikin hori marraztea eskatuko diegu.

Gogoeta egin

Paseoa eta marrazkiak abiapuntu hartuta, guztion artean gidoi honetako galderetan oinarrituriko gogoeta egitea proposatzen dizuegu.

1. Zergatik aukeratu dugu toki hori? Zergatik dugu gustuko? Zer berezitasun du? Eraikina bada, honako alderdi hauei erreparatu ahal diegu: forma, tamaina, koloreak, materialak, apaingarriak, aldamenen dituen lorategiak, zuhaitzak, ibaiak eta bestelako tokiak...



2. Lan egiteko, bizitzeko ala beste zerbaitetarako lekua da? Nork erabiltzen du gaur egun? Badakigu ezer pertsona horien ogibideei buruz?
3. Nolakoa da toki edo eraikin hori dagoen kalea? Zer dauka inguruan? Zertan du antza eta zertan bereizten da ingurutik? Bertatik, leihotatik (eraikina bada), zer ikusten da? (Saiatu marrazten).
4. Noiztik dago hor? Toki zaharra bada, zergatik uste duzu iraun duela? Nork erabiltzen zuen lehen? Nola edo zertarako erabiltzen zuten?
5. Nolakoa zen inguru edo kale hori, eraikina altxatu edo toki hori eratu zenean? Zer zeukan inguruan? Zer ikusten zen bertatik? Gogoan izan, gauzak kontatzeko, marrazkiak erabil daitezkeela beti...

Gertatu diren aldaketei erreparatu:

1. Konparatu 4. eta 5. galderei eman diezuen erantzunak 2. eta 3. galderen erantzunekin. Zer alde dago erantzun horien artean? Zertan aldatu da tokia?
2. Zure ustez, zer aldatu da hobera eta zer txarrera, denbora iraganda?

Kontserbazioa baloratu

Eman dezagun alkatea zarela. Zeuk aukeratu duzun toki horretan etxeak eraikitzeko baimena eskatu dizute, herrian etxe-premia handia dago eta. Emango zenieke baimena? Zergatik?

